

30/08/2001

Dr Mahathir deklamasi sajak

Mohd Fuad Razali

PUTRAJAYA, Rabu - Datuk Seri Dr Mahathir Mohamad malam ini memeriahkan malam kedua Pesta Puisi Patriotik 2001 dengan mendeklamasikan sajak berjudul Di Atas Runtuhan Kota Melaka Kita Dirikan Putrajaya.

Sajak Perdana Menteri yang dideklamasikan beliau dalam masa lima minit, menyentuh mengenai kaum Melayu yang masih tidak mengambil iktibar daripada sejarah 450 tahun negaranya dijajah.

Selain Dr Mahathir, isterinya, Datin Seri Dr Siti Hasmah turut membaca sajak berjudul Puteri Negara pada pesta yang diadakan di Taman Putra Perdana di sini.

Sementara itu, murid Sekolah Kebangsaan Bukit Marak, Bachok, Kelantan, Muhammad Izz Taufiq Sazalee, membacakan sajak Dr Mahathir yang berjudul Perjuangan Yang Belum Selesai.

Pesta Puisi Patriotik 2001 yang berlangsung selama dua malam itu adalah anjuran Biro Tatanegara (BTN) Jabatan Perdana Menteri dan ditaja Tenaga Nasional Berhad (TNB).

Turut hadir Menteri di Jabatan Perdana Menteri, Tan Sri Kasitah Gadam; Ketua Setiausaha Negara, Tan Sri Samsudin Osman; Ketua Setiausaha Kementerian Dalam Negeri, Datuk Seri Aseh Che Mat; Ketua Pengarah BTN, Datuk Dr Nordin Kardi dan Ketua Eksekutif TNB, Datuk Fuad Jaafar.

Pada majlis itu juga, Samsudin turut melancarkan album puisi 'Perjuangan Yang Belum Selesai' yang dinyanyikan oleh Nora dan digubah oleh Datuk Wah Idris.

Majlis yang berlangsung selama kira-kira dua jam itu turut menampilkan penyanyi puisi, Zubir Ali yang menyampaikan lagu Tanahairku, Masihkah Ada Pahlawan dan Balada.

Turut mempersembahkan nyanyian mereka pada malam ini ialah Kumpulan Koprata dan pengkaji lagu rakyat, Aripin Said.

Sasterawan Negara, Datuk A Samad Said turut mendeklamasi sajak selain tokoh pendidikan, Prof Emeritus Tan Sri Dr Awang Had Salleh; Timbalan Naib Canselor (Hal Ehwal Pelajar) Universiti Teknologi Malaysia, Prof Datuk Mohamed Mansor Abdullah, isteri Menteri di Jabatan Perdana Menteri, Datin Seri Masnah Rais, serta penyair Sutung Umar R S dan Abdul Ghafar Ibrahim.